



Fan ina bilantscha positiv a 40 onns «Residenza Andeer» da la «Hapimag SA»: Giatgen Peder Fontana, Annabeth Melchior, René Peter Verhagen e Stefan Kaufmann (da san.).



Pitschna, fina e populara è la residenza da vacanzas che sa chatta a l'ur da la vischnanca d'Andeer.

FOTOS G. N. STGIER

Tranter las trais pli popularas

40 onns «Hapimag» Residenza Andeer

DA GION NUTEGN STGIER / ANR

■ **57 residenzas e resorts da vacanzas appartegnan a la «Hapimag SA». En 16 terras da l'Europa, dals Stadis Unids da l'America ed en il Marokko ha la societad lieus cun residenzas e resorts. In da quels resorts è gia dapi 40 onns ad Andeer. Per la regiun ina residenza cun plis aspects positivs.** Avant exact 40 onns ha la «Hapimag» Residenza Andeer avert sias portas e retschet ils emprims giasts. Oz, quatter decennis pli tard sa preschenta il resort da vacanzas anc adina en in bun stadi, quai cun avair fatg la «Hapimag SA» il 2008 investi-ziuns per 2,2 milliuns francs. Grazia al

lain indigen ed al granit d'Andeer ha oz l'object in agen caracter, quai suenter la sanaziun fatga avant quatter onns. Las investi-ziuns conferman che la «Hapimag SA» vegnia er en l'avegnir a tegnair ferm en egl Andeer sco lieu cun ina residenza, ha ditg René Peter Verhagen, il manader da management da la societad acziunara cun sedia a Baar AG. El ha era ditg ch'il resort da vacanzas d'Andeer appartegnia tar in dals trais ils pli populars da tuts 57 resorts che la «Hapimag SA» maina en las 16 terras. Tar las retschertgas tgenin dals resorts da vacanzas che saja il pli popular figurescha quel d'Andeer gia dapi onns adina tranter ils trais cun la pli gronda simpatia. Dasper la «Residenza Andeer»

sajan quai anc ils dus resorts da vacanzas da la «Hapimag SA» ad Athen ed a Château de Chabenet, en la vischinanza da Paris.

Cunzunt er buna tgira dals giasts

Gratulà a la «giubilara», la residenza da vacanzas da 40 onns, ha er Stefan Kaufmann, il manader da fatschenta da Vi-mala Turissem. El ha ditg che per la regiun saja quel resort betg mo da gronda impurtanza pervia da las pernottaziuns, mabain er perquai che vegl e giuven sa sentian bain en quella chasa cun 15 appartamenti. Stefan Kaufmann ha era menziunà che quel resort da vacanzas confermia che cun qualitad, cun ina bu-

na tgira dals giasts e cun ina vendita professiunala dals appartamenti per far vacanzas funcziunaria quai er en in temp pli critic sco da preschent. El ha dentant era ludà Annabeth e Marcel Melchior che mainan dapi 15 onns cun plaschair ed engaschi quella residenza a l'ur da la vischnanca d'Andeer. Dal reminent è quel resort da vacanzas il pli pitschen che la «Hapimag SA» maina ed er il pli vegl da quels quatter resorts da vacanzas che la societad acziunara ha construì en Svizra. Ils ulteriurs trais sa chattan ad Ascona, ad Interlaken ed a Flem. Sin l'entir mund ha la «Hapimag SA» 57 residenzas da vacanzas cun total 5300 appartamenti.

7800 pernottaziuns en in onn

Da quella residenza da vacanzas ad Andeer profitescha l'entira regiun. L'onni passà han per exempel 833 giasts fatg lur vacanzas en in da quels 15 appartamenti da la «Residenza Andeer». En media ha quel resort da vacanzas fatg ils ultims onns 7800 pernottaziuns ad onn ed è sta occupà per 86%. Sulet la taxa da cura ch'il manaschi ha pajà il 2011 munta a 10 206 francs e vitiers èn anc vegnids vendids bigliets per il bogn d'Andeer e per las pendicularas da l'Arena Alva SA en ina summa da 12 751 francs. La residenza da vacanzas lavura bain cunzunt la stad e l'atun, dentant er da Nadal fin a la fin da mars.